

("Službene novine Federacije BiH", br. 9/96, 27/98, 20/00- visoki predstavnik (45/00- potvrda Parlament), 58/02- visoki predstavnik, 13/03- visoki predstavnik, (19/03- potvrda Parlament), 47/06- visoki predstavnik, 59/06, 48/08, 34/12 i 77/12)

ZAKON O AGENCIJI ZA BANKARSTVO FBiH

(nezvanično prečišćeni tekst)

1. UTEMELJENJE I SVRHA

Član 1.

(1)Ovim zakonom osniva se Agencija za bankarstvo Federacije Bosne i Hercegovine (u daljem tekstu: Agencija).

(2)Agencija je samostalna neprofitabilna institucija Federacije Bosne i Hercegovine (u daljem tekstu: Federacija).

(3)Agencija se osniva radi unapređenja sigurnosti, kvaliteta i zakonskog poslovanja tržišno orijentisanog stabilnog bankarskog, mikrokreditnog i lizing sistema u Federaciji.

Član 2.

(1)Agencija ima svojstvo pravnog lica.

(2)Sjedište Agencije je u Sarajevu.

Član 3.

(1)Naziv Agencije je: "Agencija za bankarstvo Federacije Bosne i Hercegovine".

(2)Skraćeni naziv Agencije je "FBA".

(3)Agencija ima pečat i žig.

2. DJELATNOST AGENCIJE

Član 4.

Osnovni zadaci Agencije su slijedeći:

a)izdavanje dozvole za osnivanje i rad banaka, mikrokreditnih organizacija i lizing društava;

b)nadziranje poslovanja banke, mikrokreditne organizacije i lizing društva, poduzimanje mjera, u skladu sa zakonom;

c)ukidanje dozvole za rad bankama, mikrokreditnim organizacijama i lizing društvima, u skladu sa zakonom;

d)imenuje privremene i likvidacione upravnike u banci, vrši nadzor nad postupkom privremene uprave i likvidacije banaka, prati postupak likvidacije mikrokreditnih organizacija i podnosi zahtjev za pokretanje stečajnog postupka nad bankama i mikrokreditnim društvima;

e) donošenje podzakonskih akata kojima se reguliše rad banaka, mikrokreditnih organizacija i lizing društava;

f) ocjenjuje ispunjavanje uslova i daje druga odobrenja bankama, mikrokreditnim organizacijama i lizing društvima, u skladu sa zakonima iz ovih oblasti i podzakonskim aktima;

g) nadzire i ocjenjuje usklađenosti banaka, mikrokreditnih organizacija i lizing društava sa standardima sprječavanja pranja novca i finansiranja terorističkih aktivnosti;

h) nadzire i ocjenjuje provođenje mjera banaka, mikrokreditnih organizacija i lizing društava u cilju sprječavanja finansiranja aktivnosti kojima se opstruira i/ili prijeti da opstruira proces provedbe mira koji se odvija u skladu s Općim okvirnim sporazumom za mir u BiH, u skladu sa posebnim zakonom;

Član 4a.

(1) U sastavu Agencije uspostavlja se samostalna organizaciona jedinica unutar koje djeluje jedan ili više ombudsmena za bankarski sistem (u daljem tekstu: Ombudsmen), s ciljem promoviranja i zaštite prava i interesa potrošača, tj. fizičkih lica kao korisnika finansijskih usluga.

(2) Ombudsmen, kao jedan od nosilaca zaštite prava potrošača u Federaciji BiH omogućava da se nastale nesuglasice i sporovi izme u institucija bankarskog sistema i korisnika finansijskih usluga mogu pravično i brzo riješiti od nezavisnih lica, sa minimumom formalnosti putem usaglašavanja, posredovanja ili na drugi miran način.

(3) Ombudsmen je nezavisan u obavljanju svojih zadataka i odgovara za njihovo izvršavanje, a provođenjem svojih funkcija ne djeluje kao zastupnik Agencije.

Član 4b.

Ombudsmen obavlja sljedeće zadatke:

a) pruža informacije o pravima i obavezama korisnika i davalaca finansijskih usluga;

b) prati i predlaže aktivnosti za unapređenje odnosa izme u korisnika finansijskih usluga i finansijskih organizacija bankarskog sistema Federacije BiH;

c) istražuje aktivnosti na finansijskom tržištu po službenoj dužnosti ili na osnovu prigovora, radi zaštite prava korisnika finansijskih usluga;

d) razmatra prigovore korisnika finansijskih usluga, daje odgovore, preporuke i mišljenja, te predlaže mjere za rješavanje prigovora;

e) posreduje u mirnom rješavanju spornih odnosa izme u korisnika finansijskih usluga i finansijskih organizacija bankarskog sistema Federacije BiH;

f) izdaje smjernice ili preporuke o posebnim standardnim uvjetima ili aktivnostima za primjenu dobrih poslovnih običaja u poslovanju finansijskih organizacija bankarskog sistema Federacije BiH, te predlaže Upravnom odboru Agencije donošenje akata iz njegove nadležnosti u oblasti zaštite prava korisnika finansijskih usluga;

g) sarađuje sa nadležnim pravosudnim, upravnim i drugim organima i organizacijama, kao i sa nadzornim i kontrolnim institucijama u zemlji i inozemstvu, u okviru svoje nadležnosti;

h) sarađuje sa ostalim organima i subjektima nadležnim za zaštitu prava potrošača;

i) poduzima druge radnje iz oblasti zaštite prava korisnika finansijskih usluga.

Član 4c.

(1) Ombudsmen, u postupanju po prigovorima korisnika finansijskih usluga, osigurava zaštitu njihovih prava i interesa putem:

a) postupaka razmatranja prigovora korisnika finansijskih usluga, davanjem odgovora, preporuka i mišljenja, te predlaganjem mjera za rješavanje prigovora;

b) postupaka posredovanja u mirnom rješavanju spornih odnosa, kada ocijeni da iz predmeta prigovora može doći do sudskog spora.

(2) U postupku posredovanja u mirnom rješavanju spornih odnosa ombudsmen primjenjuje propise kojima se uređuje postupak medijacije u kom slučaju može, prema potrebi, angažovati druga ovlaštena lica sa specijalističkim znanjima ili medijatore.

(3) Sporazum o nagodbi, koji učesnici u mirnom rješavanju spornog odnosa postignu uz posredovanje ombudsmena i sačine u pisanoj formi, ima snagu izvršne isprave.

Član 4d.

(1) U postupku razmatranja prigovora i posredovanja u mirnom rješavanju spornih odnosa, ombudsmen je dužan poštivati principe: zakonitosti, nepristrasnosti, stručnosti, jednakih prava i pravičnosti, efikasnosti i transparentnosti pravila i procedura postupanja ombudsmena.

(2) Pored principa iz stava (1.) ovog člana, ombudsmen je dužan u postupku mirnog rješavanja spornih odnosa primjenjivati princip dobrovoljnosti i povjerljivosti.

Član 4e.

(1) Finansijske organizacije bankarskog sistema Federacije BiH dužne su saradivati sa ombudsmenom.

(2) Ombudsmen je dužan u toku postupka razmatranja po prigovorima korisnika finansijskih usluga omogućiti finansijskim organizacijama bankarskog sistema Federacije BiH, na čije postupanje korisnik finansijskih usluga podnosi prigovore, da se izjasne o činjenicama i okolnostima navedenim u prigovoru, odnosno dostave dokaze u svoju korist.

Član 4f.

(1) Izvještaj o radu ombudsmena je sastavni dio izvještaja Agencije u skladu sa članom 27. ovog Zakona.

(2) Izvještaj o svom radu ombudsmen dostavlja Parlamentu Federacije BiH i Vladi Federacije BiH kao polugodišnji i godišnji izvještaj.

Član 4g.

(1) Ombudsmena imenuje i razrješava Odbor.

(2) Odbor će donijeti opće akte kojima se uređuju uvjeti i postupak za imenovanje i prestanak dužnosti ombudsmena, uvjeti i način postupanja po prigovorima korisnika finansijskih usluga i posredovanja u mirnom rješavanju spornih odnosa, finansiranje, izvještavanje i druga pitanja od značaja za rad ombudsmena.

Član 4h.

Na pitanja iz oblasti zaštite korisnika finansijskih usluga u bankarskom sistemu i rad ombudsmena, koja nisu uređena ovim zakonom, primjenjuju se propisi koji uređuju oblast zaštite potrošača, postupak medijacije i obligacione odnose.

3. NEZAVISNOST AGENCIJE

Član 5.

(1) U obavljanju poslova iz svog djelokruga u skladu sa odredbama ovog zakona Agencija je potpuno samostalna i nezavisna.

(2) Od formiranja Agencije Agencija, Upravni odbor Agencije, direktor Agencije, zamjenik direktora Agencije, zaposlenici Agencije, privremeni i likvidacioni upravnici, kao i druga lica koja je Agencija preporučila ili imenovala za obavljanje određenih radnji u okviru misije Agencije, ne mogu biti gonjeni za krivična djela, niti se smatrati odgovornim u građansko-pravnom postupku u vrijeme i po prestanku rada, odnosno angažmana u Agenciji za bilo koje radnje koje su izvršili u dobroj vjeri u toku izvršenja zadataka iz okvira svojih ovlaštenja. Agencija će obešteti svoje zaposlenike u pravnim postupcima pokrenutim protiv zaposlenika za radnje koje je obavio u dobroj vjeri u toku izvršavanja svojih dužnosti u okviru svojih ovlaštenja.

(3) Poslove iz djelatnosti Agencije mogu obavljati kontrolori koji imaju položen stručni ispit. Uslove i način polaganja stručnog ispita propisuje Upravni odbor Agencije.

(4) Pri obavljanju poslova iz djelatnosti Agencije ovlašćeni radnik Agencije kod predstavljanja koristi iskaznicu i značku Agencije, čiji oblik i način upotrebe propisuje direktor Agencije.

4. MEĐUNARODNA SARADNJA

Član 6.

(1) Agencija razmjenjuje podatke i ostvaruje međunarodnu saradnju samostalno ili u saradnji sa Centralnom bankom Bosne i Hercegovine, u skladu sa Zakonom o Centralnoj banci i ovim zakonom.

(2) Agencija sarađuje sa inostranim institucijama u okviru djelokruga svog rada.

5. ORGANIZACIJA, UPRAVLJANJE I RUKOVOĐENJE AGENCIJOM

Član 7.

Organizacija, upravljanje i rukovođenje Agencijom uređuje se ovim zakonom, Statutom Agencije i drugim općim aktima Agencije, u skladu sa zakonom.

Član 8.

(1) Organ upravljanja Agencijom je Upravni odbor Agencije (u daljem tekstu: Odbor).

(2) Odbor se sastoji od pet članova koje imenuje Parlament Federacije Bosne i Hercegovine (u daljem tekstu: Parlament), na prijedlog Vlade Federacije Bosne i Hercegovine (u daljem tekstu: Vlada).

(3) Odbor se imenuje na period od pet godina.

Član 9.

(1) Odbor vrši opći nadzor poslovanja Agencije i poduzima mjere za učinkovito i racionalno vršenje poslova iz djelokruga Agencije.

(2) U vršenju općeg nadzora iz stava (1.) ovog člana Odbor naročito:

- a) donosi Statut Agencije,
- b) donosi druge opće akte u skladu sa Statutom Agencije;
- c) usvaja finansijski plan i finansijske izvještaje Agencije, i
- d) usvaja izvještaje koje Agencija pravi prema članu 27. ovog zakona.

(3) Za svoj rad, Odbor odgovara Parlamentu.

Član 10.

(1) Direktor Agencije predstavlja i zastupa Agenciju, rukovodi radom Agencije i odgovoran je za rad Agencije.

(2) Direktor i zamjenik direktora Agencije učestvuju u radu Odbora, ali nemaju pravo glasa.

(3) Za svoj rad direktor i zamjenik direktora Agencije, su odgovorni Odboru i Parlamentu.

(4) Direktora i zamjenika direktora imenuje na period od pet godina Parlament na prijedlog Vlade.

Član 11.

Direktor, u okviru svojih prava i obaveza, vrši slijedeće poslove:

- a) izdaje i oduzima dozvole za obavljanje bankarskih poslova, poslova davanja mikrokredita i poslova lizinga;
- b) poduzima propisane mjere prema bankama, mikrokreditnim organizacijama i lizing društvima;
- c) sklapa obaveze u vezi sa ugovorima i interesu Agencije;
- d) imenuje osoblje i zastupnike Agencije;
- e) zastupa Agenciju u sudskim postupcima;
- f) obavlja i druge poslove propisane ovim zakonom i Statutom.

Član 12.

(1) Članovi Odbora, direktor i zamjenik direktora Agencije mogu biti ponovno imenovani, ukoliko ne postoje smetnje iz člana 15. ovog zakona.

(2) Direktor, zamjenik direktora i članovi Odbora nastaviće da obavljaju svoje dužnosti do momenta kada Parlament izvrši novo imenovanje direktora, zamjenika direktora i članova Odbora u skladu sa čl. 8. i 10. ovog zakona.

Član 13.

Naknadu članovima odbora, plaću direktoru i zamjeniku direktora, kao i djelatnicima Agencije određuje Odbor u skladu sa općim aktom Agencije.

Član 14.

(1) Za člana Odbora, direktora i zamjenika direktora Agencije može biti imenovano lice koje je državljanin BiH i koje je steklo visok ugled finansijskog stručnjaka i koje posjeduje visoke moralne osobine za vršenje povjerenih funkcija.

(2) Član odbora ne može biti djelatnik Agencije.

(3) Direktor, zamjenik direktora i djelatnik Agencije ne mogu biti zaposleni u drugom preduzeću (društvu) ili nekom drugom pravnom licu.

Član 15.

(1) Članovi Odbora, direktor ili zamjenik direktora Agencije razriješit će se od dužnosti, prije isteka mandata, ako je osuđen za krivično djelo, koje ga čini nedostojnim za vršenje službe.

(2) Parlament može razriješiti dužnosti člana Odbora, direktora ili zamjenika direktora Agencije, ako:

a) nije sposoban da vrši djelatnosti te službe zbog zdravstvene nesposobnosti;

b) je bio upleten u ozbiljan prekršaj koji znatno oštećuje interese ili autoritet Agencije, po nalazu nadležnog organa.

Član 16.

(1) Članovi Odbora, direktor i zamjenik direktora Agencije mogu podnijeti ostavku. Ostavka mora biti pismeno obrazložena.

(2) U slučaju podnošenja ostavke funkcioneri iz stava (1.) ovog člana ostaju na dužnosti do razrješenja, a najduže tri mjeseca od dana podnošenja ostavke.

Član 17.

Direktor i zamjenik direktora ne mogu bez prethodne saglasnosti Odbora biti imenovani u nadzorni odbor banke, mikrokreditne organizacije ili lizing društva ili u upravu u periodu od dvije godine nakon prestanka rada u Agenciji.

Član 18.

Članovi Odbora, direktor, zamjenik direktora, djelatnici i zastupnici Agencije ne smiju primati nikakve novčane ili druge darove, ako bi to moglo uticati na njihovu objektivnost u obavljanju poslova za Agenciju.

6. POSLOVNA TAJNA

Član 19.

(Povjerljive informacije)

(1) Povjerljive informacije su podaci, činjenice i okolnosti koje su ovlaštena lica Agencije saznala na osnovi obavljanja poslova iz svoje nadležnosti i/ili ako je Agencija iste primila od nadležnog tijela druge države, uključujući supervizorska tijela osnovana odlukama Evropskog parlamenta i Vijeća Evropske Unije (u daljem tekstu: "povjerljive informacije"). Povjerljive informacije smatraju se poslovnom tajnom. Ovlaštena lica Agencije su članovi Upravnog odbora, direktor, zamjenik direktora, zaposlenici, revizori

i druga lica koja rade ili koja su radila za ili u ime Agencije (u daljem tekstu: "ovlaštena lica"). Ovlaštena lica moraju čuvati sve informacije koje su dobili tokom supervizije ili obavljanja svojih dužnosti za Agenciju kao povjerljive.

(2) Povjerljive informacije ne smiju se otkrivati bilo kojem drugom licu ili državnom tijelu osim u zajedničkom ili sažetom obliku, na osnovu kojeg nije moguće utvrditi pojedine banke i druge finansijske subjekte koje nadzire Agencija (u daljem tekstu: drugi kontrolisani subjekti) na koje se odnose takve povjerljive informacije.

(3) Zabrana otkrivanja povjerljivih informacija navedena u stavu (2) ovog člana ne primjenjuje se u sljedećim slučajevima:

a) ukoliko je povjerljiva informacija neophodna za provo enje krivičnog postupka, ili

b) u slučaju stečaja ili likvidacije, povjerljive informacije koje su neophodne za rješavanje potraživanja povjerioca te ostalih zahtjeva koji se odnose na postupak stečaja ili likvidacije banke ili drugog kontrolisanog subjekta, ili građanski postupak koji je u vezi sa navedenim postupcima i na postupke iz tačke a) ovog stava, osim onih koji se odnose na treće strane koje su uključene u pokušaj finansijske sanacije ili reorganizacije banke ili drugog kontrolisanog subjekta.

(4) Obaveza čuvanja povjerljivih informacija navedena u st. (1), (2) i (3) ovog člana primjenjuje se i na informacije koje su Agencija ili ovlaštena lica dobili prilikom razmjene informacija sa drugim supervizorskim tijelima, uključujući Evropsku agenciju za banke i Evropski odbor za sistemski rizik. Evropska agencija za banke je Evropsko tijelo za superviziju, osnovano u skladu sa Uredbom (EU) br. 1093/2010 Evropskog parlamenta i Vijeća od 24. Novembra 2010. (OJ L 331, 15.12.2010, str.12). Evropski odbor za sistemski rizik je Evropski odbor za sistemski rizik osnovan u skladu sa Uredbom (EU) br. 1092/2010 Evropskog parlamenta i Vijeća od 24. novembra 2010. godine o Makroprudencijalnoj kontroli finansijskog sistema Evropske unije i uspostavi Evropskog odbora za sistemski rizik (OJ L 331, 15.12.2010, str.1).

Član 19a.

(Korištenje povjerljivih informacija)

Agencija može koristiti povjerljive informacije samo u sljedeće svrhe:

a) radi provjere ispunjavanja uslova za izdavanje zakonskih ovlaštenja, dozvola ili drugih odobrenja koja su banci ili drugom kontrolisanom subjektu potrebna za poslovanje i radi osiguranja supervizije na pojedinačnom ili konsolidiranom nivou nad poslovanjem banaka i drugih kontrolisanih subjekata, posebno u smislu likvidnosti, adekvatnosti kapitala, velikih izloženosti, administrativnih i računovodstvenih procedura i mehanizama interne kontrole,

b) propisivanja svim zakonima predvi enih supervizorskih mjera u slučaju kršenja pravila (kao što su nalozi, kazne i sl.),

c) u postupku upravnog spora i u drugim sudskim postupcima protiv akata Agencije.

Član 19b.

(Otkrivanje povjerljivih informacija)

(1) Agencija može otkriti povjerljivu informaciju iz člana 19. stav (1) ovog zakona sljedećim pravnim i fizičkim licima u Bosni i Hercegovini, državama članicama EU i trećim zemljama:

a) supervizorskim tijelima odgovornim za superviziju finansijskih subjekata nad kojima se vrši nadzor finansijskog sektora (banke, MKO, lizing društva, osiguravajuća društva, investicijski fondovi i sl.);

b) sudovima i drugim tijelima koja provode aktivnosti u okviru procesa likvidacije ili stečaja ili sličnim postupcima;

c) revizorima zaduženim za reviziju finansijskih izvještaja banaka i kontrolisanih subjekata;

d) nadležnim licima ili tijelima odgovornim za osiguranje depozita, uključujući Agenciju za osiguranje depozita BiH;

e) tijelima odgovornim za nadzor organa uključenih u postupak likvidacije ili stečaja banke ili kontrolisanog subjekta ili druge slične postupke;

f) tijelima odgovornim za nadzor revizora zaduženih za provedbu zakonskih revizija izvještaja banaka i kontrolisanih subjekata;

g) sudovima, nadležnom tužilaštvu ili licima koje rade po njihovim naredbama ukoliko su takve informacije potrebne za postupke koje provode u okviru svojih nadležnosti;

h) nadležnim tijelima u BiH odgovornim za finansijsku stabilnost, uključujući krizne situacije i sistemski rizik;

i) centralnim bankama Evropskog sistema centralnih banaka, uključujući Centralnu banku BiH, i drugim tijelima sa sličnim zadacima i odgovornostima kao centralne monetarne vlasti, kada su informacije bitne za provedbu njihovih odgovarajućih zakonom propisanih zadataka, uključujući provedbu monetarne politike i odnosnih odredbi vezanih za likvidnost, nadzor nad plaćanjem, sisteme kliringa i poravnanja i očuvanje stabilnosti finansijskog sistema ili, kada je to odgovarajuće, drugim tijelima odgovornim za nadzor platnih sistema, što važi i u vanrednim situacijama;

j) ministarstvu odgovornom za finansije ili državnom tijelu određene zemlje odgovornom za provedbu zakona koji uređuju superviziju banaka i kontrolisanih subjekata ili osiguravajućih društava, što važi i u vanrednim situacijama u onoj mjeri koja je neophodna za provedbu njihovih zadataka i odgovornosti;

k) centralnim klirinškim institucijama za vrijednosne papire ili drugim klirinškim kućama ili sistemima poravnanja, u skladu sa zakonom koji reguliše tržište finansijskih instrumenata u pogledu operacija kliringa i poravnanja koje se provode na jednom od tržišta u Bosni i Hercegovini, ukoliko Agencija procijeni da je takva informacija neophodna za poduzimanje odgovarajućih aktivnosti takvih institucija u pogledu neispunjavanja obaveza ili potencijalnog neispunjavanja obaveza od strane učesnika na ovim tržištima;

l) članovima kolegija supervizora u kojima je i Agencija član, u okviru provedbe zadataka ovih kolegija.

(2) Lice navedeno u stavu (1) ovog člana kojem Agencija otkrije informaciju može ovu informaciju koristiti samo u smislu provedbe supervizorskih nadležnosti i zadataka navedenih u stavu (1) ovog člana i ima obavezu čuvanja povjerljive informacije u skladu sa članom 19. ovog zakona.

Član 19c.

(Sporazumi o saradnji i razmjeni informacija)

(1) Agencija može, u okviru svoje nadležnosti, zaključiti sporazume kojim se utvrđuje razmjena informacija sa nadležnim tijelima ili licima navedenim u članu 19b. stav (1) ovog zakona, ukoliko su ispunjeni sljedeći uslovi:

a) potpisan sporazum o saradnji između Agencije i tog odgovornog nadležnog tijela ili lica o uzajamnoj razmjeni informacija,

b) ukoliko određeno nadležno tijelo ili lice podliježe obavezi čuvanja povjerljivih informacija, koja je najmanje jednaka onim navedenim u čl. 19 i 19.a ovog zakona i

c) ukoliko je svrha razmjene informacija isključivo primjena supervizorskih nadležnosti ili provedba zadataka datog nadležnog tijela ili lica.

(2) Ukoliko Agencija dobije povjerljivu informaciju od nadležnog tijela bilo koje druge zemlje, može otkriti ovu informaciju samo ukoliko postoji saglasnost odgovarajućeg nadležnog tijela i isključivo u svrhe za koje je to tijelo dalo saglasnost.

7. STATUT

Član 20.

(1) Agencija ima Statut.

(2) Statutom Agencije se naročito uređuju:

-organizacije i način poslovanja Agencije;

-način rada Odbora;

-ovlaštenje za zastupanje i potpisivanje Agencije;

-prava, obaveze i odgovornosti lica koja obavljaju poslove i zadatke s posebnim ovlaštenjem i odgovornostima, i

-druga organizacijska pitanja u vezi sa poslovanjem Agencije.

(3) Statut Agencije donosi Odbor, uz saglasnost Parlamenta.

8. FINANSIRANJE AGENCIJE

Član 21.

(1) Sredstva za rad Agencije osiguravaju se iz naknada za izdavanje dozvole za osnivanje i rad banaka, mikrokreditnih organizacija i lizing društava, naknada za nadzor rada banaka, mikrokreditnih organizacija i lizing društava i drugih prihoda.

(2) Sredstva za rad Agencije koja nisu osigurana u skladu sa stavom (1.) ovog člana osigurat će se iz Budžeta.

(3) Na osnovu godišnjeg prirasta sredstava, prekomjerni prihod u odnosu na troškove prenosi se u narednu godinu.

Član 22.

Akte o visini naknada i drugih prihoda iz člana 21. stav (1.) ovog zakona donosi Odbor.

9. IZVJEŠTAJI BANAKA, I MIKROKREDITNIH ORGANIZACIJA I LIZING DRUŠTAVA

Član 23.

(1) Banke su dužne dostavljati Centralnoj banci u skladu sa Zakonom o Centralnoj banci i Agenciji izvještaje i druge podatke po vrsti, obimu i rokovima u skladu sa propisima Centralne banke u skladu sa Zakonom o Centralnoj banci.

(2) Banke su dužne predati Centralnoj banci u skladu sa Zakonom o Centralnoj banci i Agenciji revidirane bilanse i druge finansijske izvještaje do 30. juna tekuće godine za prethodnu godinu.

(3) Mikrokreditne organizacije dužne su dostavljati Agenciji godišnji finansijski izvještaj zajedno sa revizorskim izvještajem u skladu sa Zakonom o mikrokreditnim organizacijama.

(4) Lizing društva dužna su dostavljati Agenciji godišnji finansijski izvještaj zajedno sa revizorskim izvještajem u skladu sa Zakonom o lizingu.

(5) Agencija propisuje minimum obima, oblik i sadržaj programa ekonomsko-finansijske revizije za banke, mikrokreditne organizacije i lizing društva.

(6) Agencija može odbiti izvještaj iz st. (2.), (3.) i (4.) ovog člana i zahtijevati novi izvještaj koji će izraditi ovlašteni revizor kojeg imenuje Agencija, na teret banke, mikrokreditne organizacije ili lizing društva.

Član 24.

Ako banka, mikrokreditna organizacija ili lizing društvo propusti da plati Agenciji propisanu naknadu, Agencija će oduzeti dozvolu za rad.

10. OPĆI AKTI

Član 25.

(1) U izvršavanju svojih zadataka, Agencija donosi opće akte koji su neophodni za uspješno poslovanje banaka, mikrokreditnih organizacija i lizing društava.

(2) Akti iz stava (1.) ovog člana objavljuju se u "Službenim novinama Federacije BiH". Agencija vodi evidenciju donesenih općih akata.

Član 26.

(1) Agencija je ovlaštena da vrši kontrolu banaka, mikrokreditnih organizacija i lizing društava, da pregleda i pribavi kopije poslovnih knjiga, dokumenata i računa, izdaje naloge i djeluje da bi osigurala poslovanje banaka, mikrokreditnih organizacija i lizing društava u skladu sa zakonom i drugim propisima.

(2) Banke, mikrokreditne organizacije i lizing društva obavezne su omogućiti Agenciji pristup cjelokupnoj dokumentaciji radi obavljanja poslova iz nadležnosti Agencije.

11. IZVJEŠTAJI I REVIZIJA

Član 27.

(1) Agencija je dužna dostaviti Parlamentu putem Vlade izvještaj o poslovanju u roku od tri mjeseca od kraja izvještajne godine. Izvještaj sadrži naročito analizu stanja bankarskog, mikrokreditnog i lizing sektora FBiH, opis djelatnosti Agencije tokom izvještajne godine i izvadak iz računa za tu godinu.

(2) Izvještaj mora biti odobren od Odbora.

(3) Svake godine federalna organizacija nadležna za reviziju vrši pregled računa i knjiga Agencije i izdaje izvještaj o reviziji za Parlament putem Vlade.

12. PRIJELAZNE I ZAVRŠNE ODREDBE

Član 28.

Banke koje na dan stupanja na snagu ovog zakona imaju dozvolu za obavljanje bankarskih poslova izdanu od Agencije, ostvaruju sva prava i obaveze iz te dozvole i nastavljaju s radom u skladu sa njenim ovlaštenjima.

Član 28a.

Propise za provo enje ovog Zakona donijet će Odbor i Agencija u roku od tri mjeseca od dana stupanja na snagu ovog Zakona.

Član 28b.

Poslovna tajna iz člana 19. stav (1) ovog zakona izjednačava se sa poslovnom tajnom iz Krivičnog zakona Federacije BiH i u slučaju njenog kršenja primjenjuju se kazne predvi ene navedenim zakonom

Član 29.

(Brisan)

Član 30.

(Brisan)

Član 31.

Ovaj zakon stupa na snagu danom objave u "Službenim novinama Federacije BiH".